

დანართი 1

ივ. ჯავახიშვილის სახელობის თბილისის სახელმწიფო უნივერსიტეტის სოციალურ და პოლიტიკურ მეცნიერებათა ფაკულტეტის დოქტორანტურისა და სადისერტაციო საბჭოს დებულება

თავი 1. ზოგადი დებულებები

- 1.1. ეს დებულება აწესრიგებს ივანე ჯავახიშვილის სახელობის თბილისის სახელმწიფო უნივერსიტეტში სოციალურ და პოლიტიკურ მეცნიერებათა ფაკულტეტის (ტექსტში შემდგომ „ფაკულტეტი“) სადოქტორო პროგრამების განხორციელებისა და დოქტორის აკადემიური ხარისხის მინიჭების წესს საქართველოს კანონის "უმაღლესი განათლების შესახებ" და ივანე ჯავახიშვილის სახელობის თბილისის სახელმწიფო უნივერსიტეტის (ტექსტში შემდგომ „თსუ“) აკადემიური საბჭოს დადგენილების „დოქტორანტურის მინიმალური სტანდარტის შესახებ“ შესაბამისად.
- 1.2. ეს დებულება აწესრიგებს ივანე ჯავახიშვილის სახელობის თბილისის სახელმწიფო უნივერსიტეტის სოციალურ და პოლიტიკურ მეცნიერებათა ფაკულტეტის დოქტორის აკადემიური ხარისხის მიმნიჭებელი სადისერტაციო საბჭოს ფუნქციონირების ნორმებსა და პროცედურებს.

თავი 2. დოქტორანტურა

- 2.1. "უმაღლესი განათლების შესახებ" საქართველოს კანონის მე-2 მუხლის "ტ" ქვეპუნქტის თანახმად, დოქტორანტურა წარმოადგენს უმაღლესი განათლების მესამე საფეხურს, სასწავლო პროგრამებისა და სამეცნიერო კვლევების ერთობლიობას. დოქტორანტურის მთავარი მიზანია პროფესიული მოღვაწეობის შესაბამისი სფეროების მაღალკვალიფიციური აკადემიური კადრების მომზადება, რომლებსაც შესწევთ უნარი: შექმნან ახალი ცოდნა, კრიტიკულად გაანალიზონ დაგროვილი სამეცნიერო გამოცდილება და მიღებული სამეცნიერო შედეგები გაავრცელონ პუბლიკაციების მეშვეობით, ასევე სასწავლო პროცესში და პრაქტიკაში მათი დანერგვის გზით.
- 2.2. დოქტორანტურა მოიცავს სასწავლო და კვლევით კომპონენტებს.
- 2.3. დოქტორანტი არის პირი, რომელიც სწავლობს დოქტორანტურაში.
- 2.4. დოქტორი უმაღლესი აკადემიური ხარისხია, რომელიც თბილისის ივანე ჯავახიშვილის სახელობის სოციალურ და პოლიტიკურ მეცნიერებათა ფაკულტეტის დოქტორანტურის კურსდამთავრებულს ენიჭება დისერტაციის დაცვის შემდეგ.

თავი 3. დოქტორანტურის პროგრამა და კომპონენტები

მუხლი 3.1. სადოქტორო პროგრამა

- 3.1.1. სადოქტორო პროგრამას განიხილავს ფაკულტეტის ფაკულტეტის ხარისხის უზრუნველყოფის სამსახური და დასამტკიცებლად წარედგინება თსუ აკადემიურ საბჭოს.
- 3.1.2. სადოქტორო პროგრამის შემუშავება ხდება:

- ფაკულტეტის ერთი ან რამდენიმე პროფესორის მიერ;
- უნივერსიტეტის სხვა ფაკულტეტთან ერთად;
- პარტნიორ უნივერსიტეტთან ერთად;
- სასწავლო ან სამეცნიერო დაწესებულებასთან ერთად – უნივერსიტეტსა და ამ

დაწესებულებას შორის დადებული სათანადო ხელშეკრულების საფუძველზე.

მუხლი 3.2. სადოქტორო პროგრამის ხელმძღვანელი

3.2.1. სადოქტორო პროგრამას ხელმძღვანელობს (თანახელმძღვანელობს) თსუ სოციალურ და პოლიტიკურ მეცნიერებათა ფაკულტეტის სრული ან ასოცირებული პროფესორი.

3.2.2. სადოქტორო პროგრამის ხელმძღვანელი უზრუნველყოფს დოქტორანტს სამეცნიერო ხელმძღვანელით და მის შესაბამისობას სადოქტორო თემასთან, აგრეთვე სამეცნიერო ხელმძღვანელის შეცვლის საკითხს განიხილავს სადისერტაციო საბჭოს სპეციალიზებული სექციის სხდომაზე.

3.2.3. სამეცნიერო ხელმძღვანელთან დაკავშირებით სადოქტორო პროგრამის ხელმძღვანელი წარმოადგენს წერილობით ცნობას სადისერტაციო საბჭოს თავმჯდომარის სახელზე იმის შესახებ, რომ დოქტორანტის ხელმძღვანელობის კანდიდატი აკმაყოფილებს სამეცნიერო ხელმძღვანელისადმი დებულებით გათვალისწინებულ მოთხოვნებს, კერძოდ:

- შეესაბამება სადოქტორო თემის პრობლემატიკას.
- მოცემულ მომენტში არ ჰყავს 4-ზე მეტი დოქტორანტი.
- თანახმაა გასწიოს სამეცნიერო ხელმძღვანელობა.

3.2.4. სადოქტორო პროგრამის ხელმძღვანელი ვალდებულია სადისერტაციო საბჭოს წარუდგინოს მისი პროგრამის ფარგლებში სპეციალიზებული სექციის (სპეციალიზებული სექცია. იხ. მუხლი 5.3.) საქმიანობის ამსახველი სხდომის ოქმები.

მუხლი 3.3. დოქტორანტურის კომპონენტები

3.3.1. დოქტორანტურა მოიცავს სასწავლო და კვლევით კომპონენტებს. დოქტორანტურაში სასწავლო კომპონენტი შეადგენს კრედიტების საერთო რაოდენობის 1/3, დანარჩენი 2/3 ეთმობა კვლევას. დოქტორანტმა უნდა შეასრულოს 180 კრედიტი: სადისერტაციო თემის შესრულება და დაცვა ფასდება 120 კრედიტით, დოქტორანტურის სასწავლო კომპონენტი განისაზღვრება - 40-დან 60 კრედიტამდე.

3.3.2. დოქტორანტურის სასწავლო კომპონენტის გულისხმობს დოქტორანტის დარგობრივ და მეთოდოლოგიურ დახელოვნებას და მასში შედის:

- სპეციფიკური დარგობრივი კურსებისგან შემდგარი მოდული, რომელიც გულისხმობს სადისერტაციო თემიდან გამომდინარე სპეციალური და მომიჯნავე საგნის გაღრმავებულ შესწავლას და მთავრდება გამოცდით;
- ძირითადი მეცნიერული უნარების განმავითარებელი საფაკულტეტო მოდული, რომელიც გულისხმობს კვლევის მეთოდოლოგიისა და მეთოდების შესწავლას, რაც ასევე მთავრდება გამოცდით;
- სწავლების თანამედროვე მეთოდების კურსი, რასაც მოსდევს დოქტორანტის ჩართვა სწავლების პროცესში (პროფესორის ხელმძღვანელობით ლექციებისა და პრაქტიკული მეცადინეობების ჩატარება). ამ კომპონენტის დასრულების შემდეგ დოქტორანტი ფასდება იმ პროფესორის მიერ, რომელიც ხელმძღვანელობას უწევდა წარმოდგენილ კურსს;
- დოქტორანტი თვითონ ირჩევს იმ სასწავლო კურსებს, რომლებიც მოცემულია დოქტორანტურის პროგრამაში.

3.3.3. დოქტორანტურის კვლევითი კომპონენტი მოიცავს:

- დისერტაციის ანუ სამეცნიერო ნაშრომის შესრულებას, ასევე სამეცნიერო სტატიების პუბლიკაციას, რომლებიც უნდა ასახავდეს თეორიულ ან/და ექსპერიმენტული კვლევის დასაბუთებულ შედეგებს და წვლილი შეჰქონდეს მეცნიერების განვითარებაში;

• კოლოკვიუმს, რომელიც წარმოადგენს დოქტორანტის კვლევის შედეგების პრეზენტაციას, დოქტორანტის საქმიანობის სფეროში ახალი სამეცნიერო მიღწევების, პრობლემების, ლიტერატურის შეფასება-განხილვას, რასაც მოყვება სამეცნიერო დისკუსია. დოქტორანტი ვალდებულია წელიწადში ორჯერ მაინც გააკეთოს კოლოკვიუმზე პრეზენტაცია. კოლოკვიუმის შეფასების წესს განსაზღვრავს ფაკულტეტის სადისერტაციო საბჭო.

- დისერტაციის დაცვას ანუ თემის საჯარო პრეზენტაციას.

მუხლი 3.4. დოქტორანტის ინდივიდუალური გეგმა

3.4.1. დოქტორანტის ინდივიდუალური გეგმას ადგენს დოქტორანტის ხელმძღვანელ დოქტორანტთან შეთანხმებით ინდივიდუალური გეგმა იქმნება კონკრეტულ კვლევით პროექტს განსახორციელებლად და დროში მიღებულ ცოდნის გასაღრმავებლად

3.4.2. დოქტორანტის ინდივიდუალური გეგმის ჩამოყალიბება ხდება ეტაპობრივად:

- ჩარიცხვიდან ერთი თვის განმავლობაში (რადგან 2 თვის შემდეგ ფორმდება ხელშეკრულება) სპეციალიზებული სექციის სხდომაზე განიხილება ხელშეკრულებასთან ერთად წარსადგენი ინდივიდუალური გეგმის ძირითადი პუნქტები, კერძოდ, სადოქტორო თემის საკვლევი სფერო (და არა სადოქტორო თემის სათაური), აგრეთვე, სასწავლო და კვლევითი კომპონენტების შესრულების სავარაუდო გრაფიკი.
- დასრულებული სახით დოქტორანტის ინდივიდუალური გეგმაში მოცემული უნდა იყოს სადისერტაციო თემის სათაური, კვლევის მიზანი, სადისერტაციო თემის მოკლე აღწერა, სასწავლო კომპონენტის შესრულების და კვლევის ჩატარების ვადები.

3.4.3. სადოქტორო თემის სათაური დგინდება ორ ეტაპად:

- სავარაუდო სათაური წარდგენილ უნდა იქნეს I კოლოკვიუმის შემდეგ;
- დაზუსტებული სათაური წარმოდგენილ უნდა იქნეს დოქტორანტურაში სწავლის ოთხი სემესტრის დასრულებისთანავე.

3.4.5. სადოქტორო თემის შეცვლა დასაშვებია 4 სემესტრის დასრულებამდე. ასეთ შემთხვევაში დოქტორანტის სამეცნიერო ხელმძღვანელის შუამდგომლობით სადისერტაციო საბჭოს სპეციალიზებული სექცია განიხილავს სადოქტორო თემის შეცვლის საკითხს და ღებულობს შესაბამის გადაწყვეტილებას, რომელიც ასახულია სხდომის ოქმში. ოქმი წარედგინება სადისერტაციო საბჭოს.

3.4.6. დოქტორანტის ინდივიდუალური გეგმა ინახება სადოქტორო პროგრამის ხელმძღვანელის არქივში.

მუხლი 3.5. დოქტორანტურაში ჩაბარების ვადები.

დოქტორანტურაში მიღება ცხადდება შემოდგომის და/ან გაზაფხულის სემესტრებისთვის.

მუხლი 3.6. დოქტორანტურის ხანგრძლივობა

დოქტორანტურის მაქსიმალური ხანგრძლივობა შეიძლება იყოს 5 წელი.

თავი 4. დოქტორანტურაში მიღების წესი

მუხლი 4.1. დოქტორანტურაში მიღების წინაპირობები

4.1.1. დოქტორანტურაში ჩაბარების უფლება აქვს მაგისტრის ან მასთან გათანაბრებული აკადემიური ხარისხის მქონე პირს.

4.1.2. დოქტორანტურაში სწავლის უფლება შეიძლება მიენიჭოს უცხოეთის უნივერსიტეტის კურსდამთავრებულს "საქართველოს კანონი უმაღლესი განათლების შესახებ" 50-ე მუხლის მოთხოვნათა შესაბამისად.

4.1.3. დოქტორანტურაში მიღება ცხადდება მხოლოდ აკადემიური საბჭოს მიერ დამტკიცებული სადოქტორო პროგრამის ფარგლებში.

4.1.4. დოქტორანტობის კანდიდატი წარმოადგენს დებულებით გათვალისწინებულ საბუთებს და გადის გასაუბრებაზე სადისერტაციო საბჭოს დებულებით დადგენილი წესით, დარგობრივ მიმღებ კომისიასთან.

4.1.5. დოქტორანტს უნდა მიეცეს შესაძლებლობა, მონაწილეობა მიიღოს სამეცნიერო ხელმძღვანელის შერჩევაში.

4.1.6. დოქტორანტობის კანდიდატს მოეთხოვება ერთ-ერთი ევროპული სამეცნიერო ენის (გერმანული, ინგლისური ან ფრანგული) არანაკლებ B2 დონეზე ცოდნა.

4.1.7. დოქტორანტობის კანდიდატი, თუ მას ქართულენოვან პროგრამაზე სურს სწავლა და ქართული მისი მშობლიური ენა არ არის, წარმოადგენს ქართული ენის ცოდნის დამადასტურებელ სერტიფიკატს.

4.1.8. ფაკულტეტის სადისერტაციო საბჭოს დადგენილებით და სადოქტორო პროგრამებით შეიძლება დადგენილ იქნეს დამატებითი მოთხოვნები.

მუხლი 4.2. სადისერტაციო საბჭოს მიმღები დარგობრივი კომისიები

4.2.1. თსუ სოციალურ და პოლიტიკურ მეცნიერებათა ფაკულტეტის სადისერტაციო საბჭო სადოქტორო პროგრამის ხელმძღვანელის წარდგინებით ერთჯერადად ქმნის დარგობრივ მიმღებ კომისიებს ფაკულტეტის სამეცნიერო საბჭოს შემადგენლობიდან.

4.2.2. სადისერტაციო საბჭოს მიმღები კომისია უნდა შედგებოდეს კონკრეტული სადოქტორო პროგრამის შესაბამისი, ფაკულტეტის სამეცნიერო საბჭოს წევრი სამი/ხუთი წარმომადგენლისაგან. მიმღები კომისიის თავმჯდომარე და მდივანი ყველა კონკრეტულ შემთხვევაში არჩევითია.

4.2.3. დარგობრივი მიმღები კომისია წარმოადგენს ამონაწერს სხდომის ოქმიდან დოქტორანტის სადოქტორო პროგრამაზე მიღების გადაწყვეტილების შესახებ. გადაწყვეტილება ძალაშია, თუკი სხდომის ოქმს ხელს აწერს კომისიის შემადგენლობის 4/5.

მუხლი 4.3. დოქტორანტურაში ჩარიცხვა

4.3.1. დოქტორანტურაში ჩარიცხვის მსურველს წერილობითი განაცხადი შეაქვს სადისერტაციო საბჭოს თავმჯდომარის სახელზე სადოქტორო პროგრამის, აგრეთვე იმის მითითებით, რომ განმცხადებელი არ ირიცხება სხვა საგანმანათლებლო დაწესებულების დოქტორანტურაში. განცხადებას

(დანართი 1) თან უნდა ერთვოდეს:

- დოქტორანტურაში ჩარიცხვის მსურველის ავტობიოგრაფია ნარატივის ფორმით.
- სარეკომენდაციო წერილი (პროფესორი ან ასოც/პროფესორი, ან რეკომენდატორი სამუშაო ადგილიდან). თსუ აკადემიური პერსონალის მიერ გაცემული რეკომენდაცია დამოწმებული უნდა იყოს შესაბამისი ფაკულტეტის

ბეჭდით. ყველა სხვა შემთხვევაში რეკომენდაცია დამოწმებული უნდა იყოს შესაბამისი ორგანიზაციის ბეჭდით.

- მაგისტრის (ან 5-წლიანი სწავლების) დიპლომის ნოტარიულად დამოწმებული ასლი
- პირადობის მოწმობის ასლი
- უნივერსიტეტის მიერ ორგანიზებული უცხო ენის გამოცდის დამადასტურებელი მოწმობა ასლთან ერთად ან უცხო ენის ცოდნის დამადასტურებელი სერტიფიკატი ასლთან ერთად.
- სამოტივაციო წერილი. (დანართი 2).

4.3.2. დოქტორანტურაში ჩარიცხვის მსურველი ფაკულტეტის სადისერტაციო საბჭოსთან შექმნილ შესაბამის დარგობრივ მიმღებ კომისიასთან გაივლის გასაუბრებას მიწოდებული სტანდარტის შესაბამისად (იხ. დანართი 2).

4.3.3. ფაკულტეტის სადისერტაციო საბჭოს მიმღები დარგობრივი კომისიის დადებითი გადაწყვეტილების შემთხვევაში უნივერსიტეტის რექტორი დეკანის წარდგინებით გამოსცემს დოქტორანტურაში კანდიდატის დოქტორანტად ჩარიცხვის შესახებ ინდივიდუალურ-ადმინისტრაციულ სამართლებრივ აქტს. გადაწყვეტილება ეცნობება თსუ-ს სასწავლო დეპარტამენტს; ბრძანების ერთი ასლი გადაეცემა ფაკულტეტის სადისერტაციო საბჭოს.

4.3.4. უნივერსიტეტი, დოქტორანტი, სადოქტორო პროგრამის ხელმძღვანელი და სამეცნიერო ხელმძღვანელი ჩარიცხვიდან მაქსიმუმ ორ თვეში ხელს აწერენ ხელშეკრულებას, რომელიც განსაზღვრავს ყველა მხარის ვალდებულებებსა და უფლებებს, აგრეთვე ხელმძღვანელის შრომის ანაზღაურების პირობებს. ხელშეკრულების ნაწილია დოქტორანტის ინდივიდუალური გეგმის საწყისი ვარიანტი (იხ. დებულების მუხლი 3.4.2.).

მუხლი 4.4. დოქტორანტის ხელმძღვანელი

4.4.1. დისერტაციის ხელმძღვანელი არის ფაკულტეტის სადისერტაციო საბჭოს წევრი მოქმედი პროფესორი ან ასოც. პროფესორი.

4.4.2. დისერტაციის ხელმძღვანელი, აგრეთვე, შეიძლება იყოს უნივერსიტეტის სხვა ფაკულტეტის მოქმედი პროფესორი ან ასოც. პროფესორი.

4.4.3. სამეცნიერო ხელმძღვანელის მიერ თსუ-ში დაკავებული აკადემიური თანამდებობის დატოვება არ იწვევს უარს დოქტორანტის ხელმძღვანელობაზე. ასეთ შემთხვევაში იგი მოწვეული უნდა იქნეს ფაკულტეტის სადისერტაციო საბჭოს წევრად.

4.4.4. მოწვეული სპეციალისტების საბჭოში გაწვევრიანებას ამტკიცებს ფაკულტეტის სადისერტაციო საბჭო.

4.4.5 დისერტაციის თანახელმძღვანელი შეიძლება იყოს ფაკულტეტის სადისერტაციო საბჭოს სხვა წევრი, აგრეთვე დოქტორის აკადემიური ხარისხის მქონე პირი, მათ შორის, გადამღარი პროფესორი, რომლებიც არ არიან ფაკულტეტის სადისერტაციო საბჭოს წევრები.

4.4.6. დისერტაციის ხელმძღვანელს/თანახელმძღვანელს ამტკიცებს ფაკულტეტის სადისერტაციო საბჭო დოქტორანტის ჩარიცხვიდან ერთი თვის ვადაში.

4.4.7. სამეცნიერო ხელმძღვანელი უნდა იყოს მოქმედი მკვლევარი და უნდა ჰქონდეს **კვლევის გამოცდლება** დოქტორანტის სადისერტაციო თემასთან დაკავშირებულ სამეცნიერო სფეროში.

4.4.8. ერთი პროფესორი ერთდროულად შეიძლება იყოს არაუმეტეს 5 დოქტორანტის ხელმძღვანელი.

4.4.9. სამეცნიერო ხელმძღვანელი დამტკიცების შემდეგ სადისერტაციო საბჭოს სამდივნოში წარადგენს თავის cv-სა და გამოქვეყნებულ შრომათა ნუსხას.

4.4.10. ფაკულტეტის სადისერტაციო საბჭო ღებულობს გადაწყვეტილებას დოქტორანტსა

და არსებულ ხელმძღვანელს შორის მოქმედი ხელშეკრულების შეწყვეტის თაობაზე, აგრეთვე, ახლად წარდგენილი სამეცნიერო ხელმძღვანელის დამტკიცების შესახებ. გადაწყვეტილება მიიღება დამსწრეთა რაოდენობის **უბრალო უმრავლესობით**. ახალ ხელმძღვანელთან გაფორმებული ხელშეკრულების ასლი წარედგინება სადისერტაციო საბჭოს მდივანს.

4.4.11. დისერტაციის ხელმძღვანელი კონტროლს უწევს დოქტორანტის ინდივიდუალური გეგმის შესრულებას.

მუხლი 4.5. უნივერსიტეტის მოვალეობა დოქტორანტის წინაშე

თსუ უზრუნველყოფს:

- დოქტორანტის კვლევისათვის საჭირო მატერიალურ პირობებს (კომპიუტერი, ინტერნეტ-კავშირი, ბიბლიოთეკა და ა.შ.) და სათანადო სამეცნიერო გარემოს (პროფესიონალ მკვლევარებთან ურთიერთობის შესაძლებლობას);
- დოქტორანტის მონაწილეობას თსუ სასწავლო პროცესში.

მუხლი 4.6. დოქტორანტის სტატუსის შეწყვეტა

ფაკულტეტის სადისერტაციო საბჭოს გადაწყვეტილებით დოქტორანტს შეიძლება დოქტორანტის სტატუსი შეუწყდეს:

- პლაგიატის ან მონაცემების გაყალბების დადასტურების შემთხვევაში;
- უნივერსიტეტს, დოქტორანტსა და სამეცნიერო ხელმძღვანელს შორის დადებული ხელშეკრულებით გათვალისწინებული პირობების შეუსრულებლობისას;
- ფაკულტეტის სადისერტაციო საბჭოს დებულებით გათვალისწინებულ სხვა შემთხვევებში.

მუხლი 4.7. დოქტორანტურის დაფინანსება

დოქტორანტურის დაფინანსება ხორციელდება სახელმწიფო გრანტის, საუნივერსიტეტო დაფინანსების, ქველმოქმედებისა და თვითდაფინანსების ფორმით.

თავი 5. ფაკულტეტის სადისერტაციო საბჭო

მუხლი 5.1. ფაკულტეტის სადისერტაციო საბჭო

5.1.1 ფაკულტეტის სადისერტაციო საბჭო (ტექსტში “სადისერტაციო საბჭო”) შედგება ფაკულტეტის ყველა პროფესორისა და ასოცირებული პროფესორისაგან. სადისერტაციო საბჭოს გადაწყვეტილებით, საბჭოს შემადგენლობაში შეიძლება შევიდნენ დოქტორის აკადემიური ხარისხის მქონე სხვა პირები.

5.1.2. სადისერტაციო საბჭო თავის უფლებამოსილებას განახორციელებს საქართველოს კანონმდებლობის, თსუ აკადემიური საბჭოს დადგენილებების, ფაკულტეტის დოქტორანტურისა და სადისერტაციო საბჭოს დებულების საფუძველზე. ფაკულტეტის საბჭო შეიმუშავებს სადისერტაციო საბჭოს დებულებას და დასამტკიცებლად წარუდგენს თსუ აკადემიური საბჭოს.

5.1.3. სადისერტაციო საბჭო შედგება სპეციალიზებული სექციებისაგან, რომელშიც ერთიანდებიან საბჭოს წევრი შესაბამისი დარგის სპეციალისტები.

5.1.4. სადისერტაციო საბჭო გადაწყვეტილებებს იღებს სადისერტაციო საბჭოს სხდომებზე. სხდომა უფლებამოსილია მიიღოს გადაწყვეტილება, თუ მას ესწრება წევრთა საერთო

რაოდენობის 30%-ზე მეტი. გადაწყვეტილების მისაღებად საჭიროა დამსწრეთა ხმების, სულ მცირე, 2/3, გარდა 5.1.5 მუხლში აღნიშნული შემთხვევისა. გადაწყვეტილებები მიიღება ფარული კენჭისყრით.

5.1.5. ფაკულტეტის სადისერტაციო საბჭო თავისი შემადგენლობიდან ფარული კენჭისყრით სიითი შემადგენლობის უმრავლესობით ირჩევს სადისერტაციო საბჭოს თავმჯდომარესა და თავმჯდომარის მოადგილეს 2 წლის ვადით. თავმჯდომარის არჩევამდე სხდომას უძღვება ფაკულტეტის დეკანი.

5.1.6. საბჭოს მიერ მიღებული ნებისმიერი გადაწყვეტილება ფორმდება ოქმის სახით, რომელსაც ხელს აწერს სადისერტაციო საბჭოს თავმჯდომარე და სხდომის მდივანი.

5.1.7. სადისერტაციო საბჭოს თავმჯდომარე უფლებამოსილია, მოიწვიოს საბჭოს სხდომები. სადისერტაციო საბჭოს სიითი შემადგენლობის არანაკლებ 1/5-ის წერილობითი მოთხოვნის შემთხვევაში, იგი ვალდებულია, მოიწვიოს საბჭოს რიგგარეშე სხდომა.

5.1.8. სადისერტაციო საბჭოს თავმჯდომარის არყოფნის შემთხვევაში საბჭოს საქმიანობას წარმართავს სადისერტაციო საბჭოს თავმჯდომარის მოადგილე.

მუხლი 5.2. სადისერტაციო საბჭოს უფლებამოსილება

5.2.1. სადისერტაციო საბჭო:

- ირჩევს და ამტკიცებს საბჭოს თავმჯდომარეს;
- ირჩევს და ამტკიცებს სადისერტაციო საბჭოს თავმჯდომარის მოადგილეს;
- სადისერტაციო საბჭოს თავმჯდომარის წარდგინებით ამტკიცებს სადისერტაციო საბჭოს მდივანს.
- ამტკიცებს სადისერტაციო ნაშრომის სამეცნიერო ხელმძღვანელს სადოქტორო პროგრამის ხელმძღვანელის წარდგინების საფუძველზე.
- ამტკიცებს სადისერტაციო ნაშრომის თემას;
- ადგენს სოციალურ და პოლიტიკურ მეცნიერებათა სფეროსთვის ადეკვატური სამეცნიერო პერიოდიკის აკადემიური დონის შესაფასებელ კრიტერიუმებს.
 - განსაზღვრავს სადისერტაციო ნაშრომის ზღვრულ მოცულობას, სავარაუდო ფორმატს და სხვა ტექნიკურ მონაცემებს;
 - ნიშნავს სადისერტაციო ნაშრომის შემფასებლებს (რეცენზენტებს);
 - ამტკიცებს სადისერტაციო კომისიის შემადგენლობას;
 - ამტკიცებს დაცვის თარიღს;
 - სადისერტაციო კომისიის დასკვნის საფუძველზე ანიჭებს დოქტორის აკადემიურ ხარისხს.

5.2.2. სადისერტაციო საბჭოს თავმჯდომარისა და მოადგილის უფლებამოსილება

5.2.2.1. სადისერტაციო საბჭოს თავმჯდომარე:

- უზრუნველყოფს ფაკულტეტის სადისერტაციო საბჭოს ფუნქციონირებას ფაკულტეტის დებულების საფუძველზე. პასუხისმგებელია სადისერტაციო საბჭოს საქმიანობაზე.
- უზრუნველყოფს საბჭოს ფუნქციონირებისთვის საჭირო ნორმატიული და სამოქმედო დოკუმენტების შემუშავებას, დაზუსტებასა და სრულყოფას.
- ახორციელებს კოორდინაციას უნივერსიტეტის სტრუქტურულ ერთეულებთან უნივერსიტეტის წესდების შესაბამისად.
- ხელმძღვანელობს სადისერტაციო საბჭოში საქმის წარმოებას;
- იწვევს და უძღვება სადისერტაციო საბჭოს სხდომებს.
- პასუხისმგებელია დისერტაციის დაცვის პროცედურების ორგანიზებასა და მისი შეუფერხებელი ფუნქციონირების უზრუნველყოფაზე.

- სადისერტაციო საბჭოს წარუდგენს ყოველწლიური შესრულებული საქმიანობის ანგარიშს.
- უზრუნველყოფს სადისერტაციო საბჭოს გადაწყვეტილებების გამოქვეყნებას უნივერსიტეტის ვებ-გვერდზე.

5.2.2.2. სადისერტაციო საბჭოს თავმჯდომარის მოადგილე:

- მონაწილეობს საბჭოს ფუნქციონირებისთვის საჭირო ნორმატიული და სამოქმედო დოკუმენტების შემუშავებასა, დაზუსტებასა და სრულყოფაში.
- უზრუნველყოფს სადისერტაციო საბჭოს ფუნქციონირებისთვის აუცილებელი დოკუმენტაციის დროულ და შეუფერხებელ წარმოებას უნივერსიტეტში საქმის წარმოების ერთიანი წესების შესაბამისად;
- პასუხისმგებელია სადისერტაციო საბჭოს სხდომის ოქმებისა და სხვა, სადისერტაციო საბჭოს დებულებით გათვალისწინებული დოკუმენტაციის წარმოებაზე.
- ამოწმებს დისერტანტის მიერ წარდგენილი სამეცნიერო გამოცემების შესაბამისობას სადისერტაციო საბჭოს დებულებით გათვალისწინებულ მოთხოვნებთან
- ხელმძღვანელობს საბჭოს არქივის წარმოებას;
- ეხმარება სადისერტაციო საბჭოს თავმჯდომარეს ორგანიზაციული საკითხების მოგვარებაში.
- წარმართავს საბჭოს საქმიანობას თავმჯდომარის არყოფნის ვითარებაში და უძღვება საბჭოს სხდომებს.

5.2.2.3. სადისერტაციო საბჭოს მდივანი:

- ტექნიკურად უზრუნველყოფს სადისერტაციო საბჭოს დებულებით გათვალისწინებული დოკუმენტაციის მიღებას, დაარქივებასა და შენახვას.
- კონსულტაციას უწევს და ეხმარება დოქტორანტებს დისერტაციის დაცვამდე და დაცვის შემდეგ სათანადო დოკუმენტაციის მომზადებაში.

მუხლი 5.3. ფაკულტეტის სადისერტაციო საბჭოს სპეციალიზებული სექციები

5.3.1. თსუ სოციალურ და პოლიტიკურ მეცნიერებათა ფაკულტეტის სადისერტაციო საბჭოში ფუნქციონირებს სპეციალიზებული სექციები, რომლებშიც ერთიანდებიან საბჭოს წევრი შესაბამისი დარგის სპეციალისტები, აგრეთვე, სადოქტორო პროგრამისა და დოქტორანტის სამეცნიერო ხელმძღვანელები.

5.3.2. სპეციალიზებული სექცია იქმნება ორი წლის ვადით კონკრეტული მიმართულების ბაზაზე და შედგება მუდმივმოქმედი, სულ მცირე, ხუთი პროფესორისგან (სადოქტორო პროგრამისა და დოქტორანტის სამეცნიერო ხელმძღვანელების ჩათვლით). საჭიროების შემთხვევაში მისი შემადგენლობა ფართოვდება.

5.3.3. სპეციალიზებული სექციის წევრები თავისი შემადგენლობიდან ყოველ სხდომაზე ირჩევენ სხდომის თავმჯდომარესა და მდივანს. სადისერტაციო საბჭოს სპეციალიზებული სექციის სხდომის მიმდინარეობა აისახება ოქმში, რომელსაც ხელს აწერს სხდომის თავმჯდომარე და მდივანი.

5.3.4. სადისერტაციო საბჭოს სპეციალიზებული სექცია უფლებამოსილია გადაწყვეტილება მიიღოს, თუ მას ესწრება წევრთა საერთო რაოდენობის ნახევარზე მეტი. გადაწყვეტილების მისაღებად საჭიროა დამსწრეთა ხმების 4/5.

5.3.5. ერთი პროფესორი შეიძლება ერთდროულად იყოს ორი სპეციალიზებული სექციის წევრი.

მუხლი 5.4. სადისერტაციო საბჭოს სპეციალიზებული სექციის უფლებამოსილებანი:

- განიხილავს დოქტორანტის ინდივიდუალურ გეგმას.

- განიხილავს სადისერტაციოდ წარდგენილი თემების აქტუალობას, მონაწილეობს თემის სათაურის დაზუსტების პროცესში და დასამტკიცებლად შუამდგომლობს სადისერტაციო საბჭოს წინაშე.
- ირჩევს და განიხილავს დებულებით გათვალისწინებული დოქტორანტის დაცვაზე დაშვების წესის შესაბამის ვარიანტს და დასამტკიცებლად წარუდგენს სადისერტაციო საბჭოს (იხ. პუნქტი 6.4.5).
- განიხილავს და სადისერტაციო საბჭოს წარუდგენს დარგის უცხოელი და ადგილობრივი ექსპერტების სიას.
- განიხილავს სადოქტორო პროგრამის ხელმძღვანელის მიერ წარდგენილ სამეცნიერო ხელმძღვანელობის კანდიდატს, აგრეთვე სამეცნიერო ხელმძღვანელის შეცვლასთან დაკავშირებულ საკითხებს და დასამტკიცებლად შუამდგომლობს სადისერტაციო საბჭოს წინაშე.
- განიხილავს სადისერტაციო ნაშრომის შემფასებლების (რეცენზენტის) კანდიდატურებს სადოქტორო პროგრამის ხელმძღვანელთან და თემის ხელმძღვანელთან ერთად და დასამტკიცებლად წარუდგენს სადისერტაციო საბჭოს;
- შეიმუშავებს დოქტორანტის კვლევითი კომპონენტის (პრეზენტაციების) შესაფასებელ კრიტერიუმებს, იძლევა რეკომენდაციებსა და შენიშვნებს დოქტორანტის კვლევით საქმიანობასთან დაკავშირებით.
- განიხილავს სადისერტაციო საბჭოში შესაყვან კანდიდატურებს და დასამტკიცებლად წარუდგენს სადისერტაციო საბჭოს.

თავი 6. დისერტაციის წარდგენა და დაცვა;

მუხლი 6.1. დისერტაცია

6.1.1. დისერტაცია წარმოადგენს დოქტორანტის დამოუკიდებელი კვლევის საფუძველზე შექმნილ სამეცნიერო ნაშრომს, რომელსაც საფუძვლად უდევს მოპოვებული ახალი ცოდნა და, რომელიც მოწოდებულია წვლილი შეიტანოს შესაბამისი სამეცნიერო დარგის განვითარებაში. თუ დოქტორანტი კვლევით ჯგუფშია ჩართული, ნათლად უნდა ჩანდეს მისი წვლილი კვლევისას.

6.1.2. დისერტაცია სრულდება ქართულ ენაზე. სადისერტაციო საბჭოს ნებართვით დასაშვებია მისი უცხო ენაზე შესრულება. ამ შემთხვევაში დისერტანტმა სადისერტაციო საბჭოს უნდა წარუდგინოს დისერტაციის შემოკლებული ქართულენოვანი ვარიანტი (დისერტაციის მოცულობის არანაკლებ ნახევრისა).

6.1.3. სადისერტაციო ნაშრომის ზომას, ფორმატს და სტილს განსაზღვრავს ფაკულტეტის სადისერტაციო საბჭო. სადისერტაციო ნაშრომის ზღვრული მოცულობაა –120-დან 200 გვერდამდე. საჭიროების შემთხვევაში დასაშვებია დანართი (ინდექსი, ტექსტები და ა. შ). ფურცლის ზომა A4, შრიფტის სახეობა - AcadNusx-ი, შრიფტის ზომა – 12. სტრიქონებს შორის მანძილი 1,5; გვერდის საზღვრები მარცხნიდან 3სმ, ზემოდან და ქვემოდან 2.5 სმ, მარჯვნიდან 1,5სმ. ნაშრომს თან უნდა ერთვოდეს გამოყენებული ლიტერატურის ჩამონათვალი (ციტირება და ლიტერატურის მითითება შოთა რუსთაველის სახელობის ქართული ლიტერატურის ინსტიტუტის პუბლიკაციების სტილით (იხ. დანართი 5 ან APA სტილით).

მუხლი 6.2. სადისერტაციო კომისია

6.2.1. შესაბამისი სპეციალიზებული სექცია სადოქტორო თემის სამეცნიერო ხელმძღვანელთან კონსულტაციით ქმნის სადისერტაციო კომისიას, რომელსაც ამტკიცებს

ფაკულტეტის სადისერტაციო საბჭო. სადისერტაციო კომისია იქმნება დისერტაციის დაცვამდე არაუაგვიანეს 30 დღისა. სადისერტაციო კომისიის შემადგენლობის ჩამონათვალი უნდა მოიცავდეს სათადარიგო წევრებსაც.

6.2.2. იმ შემთხვევაში, თუ ცნობილი გახდა, რომ კომისიის რომელიმე წევრს საპატიო მიზეზის გამო არ შეუძლია დისერტაციის დაცვაზე დასწრება, სადისერტაციო საბჭოს თავმჯდომარე უფლებამოსილია შეცვალოს ის საბჭოს სხვა წევრით.

6.2.3. სადისერტაციო კომისია უნდა შედგებოდეს სულ მცირე ხუთი წარმომადგენლისაგან, რომელშიც შესრულებულია დისერტაცია. სადისერტაციო კომისიის წევრთა ნახევარს მაინც შეადგენენ სადისერტაციო საბჭოს წევრები. სადისერტაციო კომისიაში შეიძლება შეყვანილ იქნეს დოქტორის აკადემიური ხარისხის მქონე სხვა პირი, რომელიც არ არის ფაკულტეტის სადისერტაციო საბჭოს წევრი. სადისერტაციო კომისიის შემადგენლობა განისაზღვრება წევრთა კენტი რაოდენობით.

6.2.4. კომისიის შექმნის შემდგომ ხმათა უბრალო უმრავლესობით აირჩევა სადისერტაციო კომისიის თავმჯდომარე და მდივანი.

6.2.5. კომისიის თავმჯდომარე უნდა იყოს უნივერსიტეტის მოქმედი ან საპატიო პროფესორი, რომელიც არ არის მოცემული დისერტაციის ხელმძღვანელი ან შემფასებელი.

6.2.6. სადოქტორო პროგრამის ხელმძღვანელი, თუკი ის არ არის დასაცავად წარდგენილი დისერტაციის სამეცნიერო ხელმძღვანელი, შეიძლება იყოს სადისერტაციო კომისიის წევრი.

6.2.7.. დისერტაციის სამეცნიერო ხელმძღვანელი და თემის შემფასებლები არ არიან სადისერტაციო კომისიის წევრები, თუმცა მათ შეუძლიათ მონაწილეობა მიიღონ კომისიის მუშაობაში სათათბირო ხმის უფლებით.

6.2.8. სადისერტაციო კომისიის გადაწყვეტილება ძალის მქონეა, თუ სხდომას ესწრება კომისიის ხუთი წევრი. სადისერტაციო კომისიის გადაწყვეტილება ძალაშია, თუ გადაწყვეტილებას მხარს უჭერს კომისიის წევრთა ნახევარზე მეტი.

6.2.9. სადისერტაციო კომისია ვალდებულია გაეცნოს დისერტაციაზე შემოსულ წერილობით გამოხმაურებებს.

მუხლი 6.3. დისერტაციის შემფასებლები და დისერტაციის დაცვაზე დაშვების პირობები

6.3.1. სადისერტაციო საბჭოს სპეციალიზებული სექცია პროგრამის ხელმძღვანელსა და დოქტორანტის სამეცნიერო ხელმძღვანელთან ერთად განიხილავს სადისერტაციო ნაშრომის შემფასებლების (რეცენზენტის) კანდიდატურებს და დასამტკიცებლად წარუდგენს სადისერტაციო საბჭოს.

6.3.2. დოქტორანტის სამეცნიერო ხელმძღვანელის მოთხოვნით, შემფასებელი შეიძლება იყოს რომელიმე სასწავლო ან სამეცნიერო დაწესებულების (მათ შორის, უცხოეთის) დოქტორის აკადემიური ხარისხის მქონე პირი, როგორც მოქმედი, ისე გადამდგარი.

6.3.3. დისერტაციას აფასებს ფაკულტეტის სადისერტაციო საბჭოს მიერ დამტკიცებული მინიმუმ სამი შემფასებელი.

6.3.4. შემფასებლად (რეცენზენტად) ინიშნება პირი, რომლის სამეცნიერო საქმიანობა და სამეცნიერო შრომები შეესაბამება სადისერტაციო ნაშრომის სპეციფიკას.

6.3.5. დისერტაციის შეფასება წერილობითი სახით გადაეცემა ფაკულტეტის სადისერტაციო საბჭოს. შემფასებლებმა თავიანთი წერილობითი დასკვნა უნდა წარმოადგინონ მათთვის დისერტაციის გადაცემიდან არა უგვიანეს 3 თვის ვადაში. დასკვნაში მითითებული უნდა იყოს გადაწყვეტილება დისერტაციის დაცვაზე დაშვების ან შესასწორებლად დოქტორანტისათვის დაბრუნების, ანდა დაცვაზე უარის თქმის შესახებ.

6.3.6. რომელიმე ან ყველა შემფასებლის მხრიდან დაცვაზე უარის მიღების შემთხვევაშიც დისერტანტს აქვს საჯარო დაცვაზე დისერტაციის წარდგენისა და

დაცვის უფლება პირადი მოთხოვნის საფუძველზე. შესაბამისი განაცხადით დისერტანტი მიმართავს სადისერტაციო საბჭოს თავმჯდომარეს.

6.3.7. დისერტაციის დაცვაზე დაუშვებლობის შემთხვევაში სადოქტორო საბჭოს გადაწყვეტილებით დოქტორანტს დისერტაციაზე დამატებით მუშაობის უფლება ეძლევა. შესწორებულ ვერსიას დოქტორანტი სადისერტაციო საბჭოს ხელახლა წარუდგენს არაუადრეს 1 წლისა. საბოლოო წარდგენის ვადა განისაზღვრება 18 თვით დოქტორანტის დისერტაციაზე დამატებით მუშაობის უფლების მინიჭებიდან. წინააღმდეგ შემთხვევაში პირი დაცვაზე აღარ დაიშვება.

6.3.8. ტექნიკური (არაკადემიური, სტანდარტების დარღვევა) ხასიათის შენიშვნების შემთხვევაში დისერტაცია დაცვაზე დაიშვება ამ შენიშვნების აღმოფხვრის დათქმით.

6.3.9. სადისერტაციო საბჭოს თავმჯდომარემ დოქტორანტს წერილობით უნდა აცნობოს საბჭოს გადაწყვეტილება, რომელიც დაკავშირებულია დისერტაციის დაცვაზე დაშვების და შემფასებლების მიერ მიღებული გადაწყვეტილების შესახებ. დაცვაზე დაშვების შემთხვევაში შეტყობინებაში მითითებული უნდა იყოს დაცვის თარიღი.

6.3.10. დისერტაციის დაცვა უნდა დაინიშნოს შეტყობინებიდან 30-40 დღის ფარგლებში.

6.3.11. სადისერტაციო საბჭო ვალდებულია დოქტორანტს გადასცეს შემფასებლების დასკვნების ასლები.

6.3.12. დისერტაციასთან დაკავშირებული მთელი დოკუმენტაცია ინახება სადისერტაციო საბჭოს არქივში. დოქტორანტი ვალდებულია გაეცნოს მის დისერტაციასთან დაკავშირებულ დოკუმენტაციას.

მუხლი 6.4. დისერტაციის წარდგენა

6.4.1. დოქტორანტი ფაკულტეტის სადისერტაციო საბჭოს გადასცემს ქართულ ენაზე დისერტაციის 4, ხოლო საჭიროების შემთხვევაში, უცხო ენაზე – 1 ეგზემპლარს აკინძული სახით, აგრეთვე, მათ ელექტრონულ ვერსიებს. უცხოენოვანი ვერსიის მოცულობაა 40 გვერდი სადისერტაციო საბჭოს დებულებით გათვალისწინებული სტანდარტების დაცვით.

6.4.1. დოქტორანტს შეუძლია წარმოადგინოს დისერტაციის უცხოენოვანი ვერსია ინგლისურ, გერმანულ, ფრანგულ ან რუსულ ენაზე.

6.4.2. დისერტაცია სარეცენზიოდ მიეწოდება სამ შემფასებელს, აქედან ერთი შეიძლება იყოს უცხოელი.

6.4.3. დისერტაციის დაცვაზე დასაშვებად დოქტორანტის სამეცნიერო ხელმძღვანელი სადისერტაციო საბჭოს წარუდგენს წერილობით დასკვნას იმის თაობაზე, რომ სადისერტაციო ნაშრომი მზად არის საჯარო განხილვაზე წარსადგენად, აგრეთვე **ადასტურებს** იმ სამეცნიერო გამოცემების შესაბამისობას სადისერტაციო საბჭოს დებულებით გათვალისწინებულ მოთხოვნებთან, რომლებშიც დაბეჭდილია დისერტანტის პუბლიკაციები.

6.4.4. სადისერტაციო ნაშრომთან ერთად დოქტორანტმა უნდა წარადგინოს შემდეგი დოკუმენტები:

- სადოქტორო პროგრამით გათვალისწინებული 60 ECTS სასწავლო კრედიტის დაგროვებისა და პრეზენტაციების შეფასების დამადასტურებელი დოკუმენტები;
- გამოქვეყნებული სამეცნიერო ნაშრომების ამონაბეჭდი, პუბლიკაციების შემთხვევაში.

6.4.5. დაცვაზე დასაშვებად დოქტორანტს უნდა ჰქონდეს:

- **სამი** პუბლიკაცია სადისერტაციო საბჭოს მიერ აღიარებულ როგორც უცხოურ პერიოდულ, ისე, ქართულ სამეცნიერო გამოცემაში;
- უცხოელი ექსპერტის რეცენზია გამოქვეყნებულ სტატიაზე იმ შემთხვევაში, თუ სამეცნიერო პერიოდული გამოცემა არ არის აღიარებული სადისერტაციო

საბჭოს მიერ; ან

➤ დისერტაციის უცხოენოვან 40 გვერდიან ვარიანტზე უცხოელი ექსპერტის მიერ წარმოდგენილი რეცენზია. ასეთ შემთხვევაში მას პუბლიკაციები არ მოეთხოვება.

▪ იმ შემთხვევაში, როცა წარმოდგენილი პუბლიკაციის სამეცნიერო ღირებულება საკამათოა (საკონფერენციო მოხსენების გამოქვეყნებული ტექსტი, აგრეთვე კვლევითი პროექტის ფარგლებში შესრულებული პუბლიკაცია), ეს პუბლიკაცია ექვემდებარება დამატებით ექსპერტიზას, რომელსაც ასრულებს სპეციალურად ამ მიზნით გამოყოფილი ორი ექსპერტი, მათ შორის ერთი აუცილებლად უნივერსიტეტის გარედანაა. ანონიმურობა და ექსპერტთა ურთიერთდამოუკიდებლობა ექსპერტიზის მთავარი მოთხოვნებია.

6.4.6. დისერტანტის დაცვაზე დაშვების წესის ვარიანტებიდან ერთ-ერთს ირჩევენ სადისერტაციო საბჭოს სპეციალიზებული სექციები და დასამტკიცებლად წარუდგენენ სადისერტაციო საბჭოს.

6.4.7. დისერტაციის საერთაშორისო რეცენზირებას უზრუნველყოფს თსუ საერთო-საუნივერსიტეტო წესით.

6.4.8. დისერტანტის მოთხოვნით პუბლიკაციის საერთაშორისო რეცენზირება ხდება იმავე წესით.

6.4.9. ფაკულტეტის სადისერტაციო საბჭოს შეუძლია შემოიღოს დისერტაციის წარდგენისა და დაცვის პროცედურასთან დაკავშირებული დამატებითი მოთხოვნები.

მუხლი 6.5. დისერტაციის დაცვა

6.5.1. დისერტაციის დაცვის რეგლამენტი განისაზღვრება სადისერტაციო საბჭოს მიერ.

6.5.2. დაცვა არის საჯარო. მის მსვლელობასა და შედეგზე უნდა შედგეს საბოლოო ოქმი, რომელსაც ხელს აწერენ სადისერტაციო კომისიის თავმჯდომარე და მდივანი.

6.5.3. დაცვის ენა არის ქართული; სადისერტაციო საბჭო უფლებამოსილია მიიღოს დაცვის სხვა ენაზე წარმართვის გადაწყვეტილება.

6.5.4. დისერტაციის დაცვა შედგება შემდეგი პროცედურებისაგან:

- დოქტორანტის მოხსენება (არა უმეტეს 30 წუთისა);
- სამეცნიერო დისკუსია;
- რეცენზიების საჯაროდ წაკითხვა;
- დოქტორანტის მიერ რეცენზიებში წარმოდგენილ სადისკუსიო საკითხებზე პასუხის გაცემა;
- კომისიის დახურული სხდომა – სადისერტაციო ნაშრომის შესაფასებლად;
- სადისერტაციო ნაშრომის შეფასების გამოცხადება;
- დისერტანტის საბოლოო სიტყვა.

6.5.5. სადისერტაციო კომისიის ერთ სხდომაზე შეიძლება ჩატარდეს მხოლოდ ერთი დისერტაციის დაცვა.

მუხლი 6.6 დისერტაციის შეფასება

6.6.1 დისერტაციის შეფასების კრიტერიუმებს ადგენს სადისერტაციო საბჭოს სპეციალიზებული სექციები.

6.6.2. დაცვა ფასდება სადისერტაციო კომისიის მიერ დახურულ სხდომაზე დაცვის დასრულებისთანავე. დისერტაციისა და დაცვის შეფასებების საფუძველზე სადისერტაციო კომისია ადგენს საბოლოო შეფასებას.

6.6.3. საბოლოო შეფასება ხდება შემდეგი სისტემის მიხედვით:

- summa cum laude - ფრიადი
- magna cum laude - ძალიან კარგი
- cum laude - კარგი
- bene - საშუალო
- rite - დამაკმაყოფილებელი
- insufficienter - არადამაკმაყოფილებელი
- sub omni canone - სრულიად არადამაკმაყოფილებელი

6.6.4. დისერტაცია არ არის დაცული, თუკი მას სადისერტაციო კომისიის უმრავლესობა ავასებს როგორც „არადამაკმაყოფილებელს“ ან „სრულიად არადამაკმაყოფილებელს“.

6.6.5. ხმათა თანაბრად დაყოფის შემთხვევაში გადამწყვეტი მნიშვნელობა ენიჭება სადისერტაციო კომისიის თავმჯდომარის ხმას.

6.6.6. სადისერტაციო კომისიის თავმჯდომარე დოქტორანტს კომისიის დასაბუთებულ გადაწყვეტილებას აცნობს ზეპირად.

6.6.7. დოქტორანტს აკადემიურ ხარისხს ანიჭებს ფაკულტეტის სადისერტაციო საბჭო.

6.6.8. თუ დისერტაცია არ იქნა დაცული, საჯარო დაცვაზე დისერტაციის ხელმეორედ გამოტანა შესაძლებელია მომდევნო 6 თვის განმავლობაში.

6.6.9. დოქტორანტის განცხადება განმეორებითი დაცვის მოთხოვნის თაობაზე ფაკულტეტის სადისერტაციო საბჭოს თავმჯდომარეს უნდა წარედგინოს შედეგის გამოცხადებიდან 1 თვის განმავლობაში.

6.8.10. დისერტაციის განხილვისა და შეფასების დამატებითი მოთხოვნები განისაზღვრება სადისერტაციო საბჭოს მიერ.

მუხლი 6.7. დოქტორის აკადემიური ხარისხის მინიჭება

ფილოსოფიის დოქტორის აკადემიური ხარისხის მინიჭებას ახორციელებს სოციალურ და პოლიტიკურ მეცნიერებათა ფაკულტეტის სადისერტაციო საბჭო.

მუხლი 6.8. დისერტაციის გამოქვეყნება

6.8.1. დაცვის შემდეგ დისერტაცია უნდა გამოქვეყნდეს ბეჭდური ან ელექტრონული ფორმით. დისერტაციის ბეჭდური ვერსია უნდა გამოიცეს თსუ-ს გამომცემლობის მიერ, ხოლო ელექტრონული ვერსია ორ ენაზე უნდა განთავსდეს სოციალურ და პოლიტიკურ მეცნიერებათა ფაკულტეტის ელექტრონულ ბიბლიოთეკაში. ფაკულტეტი ვალდებულია უზრუნველყოს დისერტაციის გამოქვეყნების ტექნიკური მხარე.

6.8.2. აკადემიური ხარისხის დამადასტურებელი მოწმობა არ გაიცემა დისერტაციის ბეჭდური ან ელექტრონული ფორმით გამოქვეყნებამდე.

მუხლი 6.9. დოქტორის აკადემიური ხარისხის დამადასტურებელი დიპლომი

6.10.1. დისერტაციის დაცვის და გამოქვეყნების შემდეგ დოქტორანტს გადაეცემა ფილოსოფიის დოქტორის აკადემიური ხარისხის დამადასტურებელი დიპლომი შესაბამის დარგში. დოქტორის აკადემიური ხარისხის მინიჭების დამადასტურებელი დიპლომის გაცემის შემდეგ პირი უფლებამოსილია, იწოდებოდეს ფილოსოფიის დოქტორად.

6.10.2. დიპლომი შეიცავს დისერტაციის სახელწოდებას, დაცვის თარიღსა და საერთო შეფასებას. დიპლომს ხელს აწერს უნივერსიტეტის რექტორი, ფაკულტეტის დეკანი, სადისერტაციო საბჭოს თავმჯდომარე და მოწმდება უნივერსიტეტის ბეჭდით. დიპლომის ასლი ინახება თსუ არქივში.

6.10.3. თუ დისერტაცია მომზადდება უნივერსიტეტთაშორისი სადოქტორო პროგრამის ფარგლებში და დაცვა განხორციელდა თსუ სოციალურ და პოლიტიკურ მეცნიერებათა ფაკულტეტზე, ამ შემთხვევაში, მოწმობა უნდა შეიცავდეს მითითებას, თუ რომელი უნივერსიტეტები მონაწილეობდნენ აღნიშნულ პროგრამაში.

მუხლი 6.10. ბათილობა

სადისერტაციო საქმის წარმოებისას არასწორი მონაცემების წარდგენა და აკადემიური პატიოსნების ნორმების დარღვევა არის დოქტორის აკადემიური ხარისხის დამადასტურებელი მოწმობის არგაცემის ან ჩამორთმევის საფუძველი. შესაბამის გადაწყვეტილებას იღებს ფაკულტეტის სადისერტაციო საბჭო.

თავი 7. უნივერსიტეტთაშორისი სადოქტორო პროგრამები

მუხლი 7.1. უნივერსიტეტთაშორისი სადოქტორო პროგრამის სტატუსი

7.1.1. შესაძლებელია აკადემიური ხარისხის ერთობლივი მინიჭება უნივერსიტეტთაშორისი სადოქტორო პროგრამის ფარგლებში. ამ დებულებით უნივერსიტეტთაშორის სადოქტორო პროგრამაში იგულისხმება ორი ან რამდენიმე უნივერსიტეტის მიერ განხორციელებული სადოქტორო პროგრამა, რომლის ერთ-ერთი მონაწილეა თსუ, კერძოდ კი პოლიტიკურ და სოციალური მეცნიერებათა ფაკულტეტი.

7.1.2. უნივერსიტეტთაშორისი სადოქტორო პროგრამის განხორციელება წესრიგდება თბილისის სახელმწიფო უნივერსიტეტის მიერ სხვა უნივერსიტეტთან დადებული შეთანხმებით თანამშრომლობისა და ერთობლივი დოქტორანტურის შექმნის შესახებ.

მუხლი 7.2. განცხადება უნივერსიტეტთაშორისი სადოქტორო პროგრამაში მონაწილეობის შესახებ

7.2.1 უნივერსიტეტთაშორისი სადოქტორო პროგრამის არსებობის შემთხვევაში დოქტორანტურაში ჩარიცხვის კანდიდატი უნდა აკამაყოფილებდეს ამ პროგრამის ფარგლებში მონაწილე უნივერსიტეტების დოქტორანტურაში მიღების წინაპირობებს.

7.2.2 განცხადებას ამ დებულებით გათვალისწინებულ საბუთებთან ერთად უნდა დაერთოს პარტნიორი უნივერსიტეტის შესაბამისი პროფესორის (ასეთის არსებობის შემთხვევაში) თანხმობა თემის თანახელმძღვანელობაზე.

მუხლი 7.3. უნივერსიტეტთაშორისი სადოქტორო პროგრამის ფორმები უნივერსიტეტთაშორისი სადოქტორო პროგრამის ფორმებია:

- ერთობლივი ხარისხის მინიჭება;
- ერთობლივი სწავლების ორგანიზება;
- თანახელმძღვანელების არსებობა.

მუხლი 7.4. უნივერსიტეტთაშორისი სადოქტორო პროგრამის დისერტაციის ხელმძღვანელი / თანახელმძღვანელები

7.4.1. უნივერსიტეტთაშორისი სადოქტორო პროგრამის განხორციელების შემთხვევაში

დისარტაციას ხელმძღვანელად ინიშნება ამ პროგრამაში მონაწილე ერთ-ერთი უნივერსიტეტის პროფესორი ან თანახელმძღვანელებად ინიშნებიან თითო პროფესორი ორივე უნივერსიტეტიდან.

7.4.3 დისერტაციის დაცვაზე დასაშვებად აუცილებელია, დოქტორანტის თანახელმძღვანელებმა სადისერტაციო საბჭოს წარუდგინონ წერილობითი დასკვნა იმის თაობაზე, რომ ისინი გაეცნენ დისერტაციას და ნაშრომი მზად არის საჯარო განხილვაზე წარსადგენად.

7.4.3. თუ უნივერსიტეტთაშორისი სადოქტორო პროგრამის ფარგლებში განხორციელებული დისერტაციის დაცვა დანიშნულია თსუ სოციალურ და პოლიტიკურ მეცნიერებათა ფაკულტეტის სადისერტაციო საბჭოზე დისერტაციის საქმის წარმოება და დისერტაციის დაცვის პროცედურა წარიმართება ამ დებულებით.

თავი 8. საპატიო დოქტორის წოდების მინიჭება

მუხლი 8.1 საპატიო დოქტორის წოდება

8.1.1. სოციალურ მეცნიერებათა სფეროში განსაკუთრებული სამეცნიერო დამსახურების მქონე პირს შეიძლება მიენიჭოს საპატიო დოქტორის – დოცტორ ჰონორის ცაუსა (Dr.h.c.) - აკადემიური ხარისხი.

8.1.2. საპატიო დოქტორის წოდების მინიჭების თაობაზე გადაწყვეტილებას ფაკულტეტის სამეცნიერო საბჭოს წარდგინების საფუძველზე იღებს თბილისის სახელმწიფო უნივერსიტეტის აკადემიური საბჭო.

თავი 9. გარდამავალი დებულებები

9.1.1. გარდამავალი პერიოდი გრძელდება სადოქტორო პროგრამებზე მიღების გამოცხადებიდან 2 წელი.

9.1.2. დოქტორის აკადემიური ხარისხის მისაღებად თსუ-ს ყველა მაძიებელმა და ასპირანტმა უნდა ჩააბაროს დოქტორანტურაში მინიმალური სტანდარტით განსაზღვრული წესით.

9.1.3. თსუ დოქტორანტურაში ჩარიცხული ასპირანტები და მაძიებლები, რომელთაც მინიმუმის საგნები აქვთ ჩაბარებული ან/და აპრობაცია აქვთ გავლილი, თავისუფლდებიან მინიმალური სტანდარტით გათვალისწინებული სასწავლო კომპონენტის კრედიტების დაგროვებისგან. მათი დოქტორანტურაში ჩარიცხვა მოხდება ერთ-ერთი ევროპული სამეცნიერო ენის (გერმანული, ინგლისური ან ფრანგული) არანაკლებ B2 დონეზე ცოდნის დამადასტურებელი სერტიფიკატის წარმოდგენის შემდეგ. ამ სერტიფიკატის წარმოდგენა უნდა მოხდეს დოქტორანტურაში პირველი მიღების გამოცხადების დღიდან არაუმეტეს ორი წლის განმავლობაში. დისერტაციის წარდგენა და დაცვა ხორციელდება მინიმალური სტანდარტით დადგენილი წესით.

9.1.4. თსუ-ს ის ასპირანტები და მაძიებლები, რომელთაც შესრულებული აქვთ ამ დებულებით გათვალისწინებული კვლევითი კომპონენტი და არა აქვთ ჩაბარებული მინიმუმის გამოცდები, სასწავლო კომპონენტით განსაზღვრული კრედიტების დაგროვების შემდეგ დისერტაციას წარადგენენ და დაიცავენ მინიმალური სტანდარტით დადგენილი წესით.

9.1.5. იმ კვლევითი ინსტიტუტების ასპირანტები, რომლებთანაც თსუ დადებული აქვს ხელშეკრულება, დოქტორანტები ხდებიან ამ პარაგრაფის პირველი მუხლის შესაბამისად.

თავი 10. დასკვნითი დებულებები

მუხლი 10.1 დებულების ძალაში შესვლა

10.1.1. წინამდებარე დებულებაში დამატებისა და ცვლილების შეტანის შესახებ წინადადების დასმის უფლება აქვს სადისერტაციო საბჭოს ნებისმიერ წევრს. დასაბუთებულ წინადადებას განიხილავს სადისერტაციო საბჭო უახლოეს სხდომაზე და დადებითი გადაწყვეტილების შემთხვევაში განსახილველად წარუდგენს ფაკულტეტის საბჭოს. დებულებაში შეტანილ ყველა დამატებასა და ცვლილებას ამტკიცებს უნივერსიტეტის აკადემიური საბჭო.

10.1.2. ეს დებულება ძალაში შედის აკადემიური საბჭოს მიერ მისი დამტკიცებისთანავე.